

CONVENIO DE COLABORACIÓN ENTRE A AXENCIA TURISMO DE GALICIA E A DEPUTACIÓN DE OURENSE PARA A ORGANIZACIÓN DA 25 EDICIÓN DO OURENSE FILM FESTIVAL, OUFF

MEMORIA XUSTIFICATIVA

A xerente de Turismo de Galicia

DECLARA:

Que esta Axencia Turismo de Galicia formalizou coa Deputación de Ourense o instrumento convencional arriba referido por un período de vixencia que abrangue dende a data da súa sinatura ata o 31 de decembro de 2020.

Que o instrumento convencional ten por obxecto establecer o marco de colaboración entre Axencia Turismo de Galicia e a Deputación de Ourense para a organización da 25 edición do Ourense Film Festival (OUFF), que se celebrará entre o 25 de setembro e o 3 de outubro de 2020.

Que existe converxencia de intereses entre as entidades asinantes en orden á consecución obxecto referido.

Que o instrumento convencional que se pretende asinar se **fundamenta** no seguinte:

Primeiro.- A Axencia Turismo de Galicia, segundo o Decreto 196/2012, do 27 de setembro, polo que se crea a Axencia de Turismo de Galicia e se aproban os seus estatutos, é a entidade pública instrumental da Comunidade Autónoma de Galicia á que lle corresponde o exercicio, entre outras, das competencias en materia de coordinación, impulso, xestión e execución das actividades de promoción do turismo, e para lograr esta finalidade a Axencia Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.

Segundo.- Que tal e como establece a Lei 7/1985, do 2 de abril, reguladora das bases do réxime local no seu artigo 36, as deputacións teñen, entre outras, as competencias de cooperación no fomento do desenvolvemento económico e social, e na planificación no



territorio provincial, de acordo coas competencias das demais administracións públicas neste ámbito, e, en xeral, o fomento e a administración dos intereses peculiares da provincia.

Que entre as competencias que, no relativo ás relacións coas entidades locais galegas, lle corresponden á Xunta de Galicia, de acordo co disposto nos artigos 194 e 195 da Lei 5/1997, do 22 de xullo, de administración local de Galicia, está a de cooperación e colaboración, as cales se poden levar a cabo mediante a formalización de convenios.

Para lograr esta finalidade a Axencia Turismo de Galicia acomete, no ámbito das súas competencias, un decidido apoio ás iniciativas das entidades locais.

Terceiro.- Ao abeiro do disposto na Lei 5/1997, do 22 de xullo, de Administración local de Galicia, a Xunta de Galicia e as entidades locais poderán celebrar convenios de colaboración entre si para a máis eficaz xestión e prestación de servizos da súa competencia, podendo coordinar as súas políticas de fomento dirixidas a un mesmo sector, executar puntualmente obras ou servizos e adoptar as medidas oportunas para acadar calquera outra finalidade de contido análogo.

Cuarto.- Que o Ourense Film Festival, OUFF, aspira a ser o festival de Galicia, porque este país precisa dunha cita anual que se axuste ao modelo estandarizado no resto do Estado español e do mercado internacional. Un modelo singularizado, actualmente en desenvolvemento, en absoluto excluínte con outras propostas existentes no ameto galego, pero que ao tempo que potencie a cultura audiovisual, a creatividade e o talento propios, en suma o sector audiovisual, se axuste a uns parámetros lúdicos e de espectáculo comprometidos co propio desenvolvemento da provincia. Esta aspiración ven avalada pola tradición histórica vinculada ao desenvolvemento do propio cine galego, que son os mellores alicerces para asentar a base para converterse no festival de Galicia.

Desde a súa creación en 1996, o Ourense Film Festival (OUFF) é un dos acontecementos máis destacados en Galicia na súa especialidade, coa aspiración histórica de converterse no festival audiovisual da comunidade autónoma. Ao longo da súa traxectoria consolidouse en canto a promover o cinema de autor e ao tempo social, mantendo o seu compromiso de erixirse no punto de encontro anual para os profesionais do sector en Galicia, ao tempo que produce un importante retorno económico para a cidade. Compre ter en conta o importante vínculo desta provincia co cinema.



O impulso inicial, debeuse nas primeiras edicións ao Concello de Ourense que para a presente edición cedeu a súa marca OUFF e a súa organización á Deputación de Ourense, que ao tempo asinou un convenio coa Fundación Carlos Velo para integrarse na súa organización, ao fío da súa condición de fundación única do seu tipo en Galicia e en España, ademais do seu vínculo directo con México, país de acollida do cineasta e por ter como presidenta de honra á escritora, guionista e directora, Laura Gárdos Velo.

Compre considerar igualmente que o OUFF é o certame máis antigo de carácter internacional e competitivo que se celebra en Galicia, cun selo diferencial que traspasa as propias fronteiras do país. A difusión do mesmo vai cobrando importancia, por consolidarse como punto de encontro dos afeccionados e profesionais do medio cinematográfico, fundamentalmente de España, Galicia e norte de Portugal, o que supón que se converteu nun foco de interese para todo tipo de persoas relacionadas co audiovisual. Moitas das películas nacionais e internacionais premiadas neste festival, atoparon posteriormente unha distribución primeira, o certame ourensán ha servido de gran escaparate e punto de encontro para a industria cinematográfica de Galicia. Asembleas, debates, mesas redondas, presentación de proxectos, proxección de longametraxes e curtametraxes, publicacións e homenaxes que contaron coa presenza de produtores, directores, distribuidores, técnicos e actores relacionados coa produción galega. Aquí déronse cita colectivos tan importantes como a Asociación de Intérpretes Sociedade de xestión (AISGE), Academia Galega do Audiovisual, Asociación Galega de Produtores Independentes (AGAPI), Clúster do Audiovisual, SGAE, etc.

Quinto.- O Plan Estratéxico do Turismo de Galicia 2020, na liña estratéxica 9, Comercialización, inclúe como obxectivo estratéxico 9.3, a diferenciación baseada nos recursos endóxeos, e como acción 9.3.2, o turismo cultural, na súa descrición establécese que da man da Consellería de Cultura, Educación e Ordenación Universitaria, fomentárase o turismo cultural en todas as súas vertentes.

Sexto.- Que a través deste convenio, outórgase á Deputación de Ourense unha subvención directa en virtude do disposto no artigo 19.4 c) da Lei 9/2007, do 13 de xuño, de Subvencións de Galicia, polas razóns de interese público, social, económico e humanitario expostas nos puntos anteriores e que dificulta a súa convocatoria pública, de conformidade co previsto no artigo 26.2.a) da Lei 9/2007 do 13 de xuño, de subvencións de Galicia.





XUNTA DE GALICIA

VICEPRESIDENCIA PRIMEIRA E
CONSELLERÍA DE PRESIDENCIA,
XUSTIZA E TURISMO
Turismo de Galicia

galicia

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de contratos do sector público, pola que se transpoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase esta memoria, en Santiago de Compostela

O xerente de Turismo de Galicia

Emilio José de la Iglesia Lema



Xacobeo 2021